

ко граду Володимеру. Митрополить же с чиномъ церковнымъ вкупе, князи и бояре и весь народъ, мали и велиции сretoша боголюбимо со свещами и кандилы; от множества же народа изгнѣтахуся, хотяше прикоснутися честнемъ тѣле и одрѣ. Бысть же плачь велий, кричаніе и туга, яко же нѣсть было, токмо и земли потрястися. Положено бысть тѣло его в рожествѣ святыя богородица, месеца ноября въ 23 день, на память святаго Анфилофья. [л. 324 об.] Бысть же тогда чудо дивно и памяти достойно: егда же вложиша святое тѣло в раку, икономъ же Савастиянъ митрополита Кюрила, приступль хотя разнять руку его, да вложить митрополить грамоту душевную, онъ же самъ, яко живъ суще, распростеръ руку свою и взять грамоту от руку митрополита. Приятъ же ужась великий, егда от раки его отступаша. Се же бысть проповѣдано всѣм от Кюрила митрополита святителя и от иконома его Савастияна. Се же слышавши бывшее, братие, кто не дивится о семъ, яко тѣлу бездушну существу, превезену от далнихъ странъ, в годъ зимы [и т]ако прослави богъ угодника своего. Богу же нашему слава, прославльшему святая своя, въ вѣки вѣкомъ. Аминь

---